

Дуодаман

Image not found or type unknown



11:42 / 22.05.2023 1669

Дуодаман

Саҳар чоғи жола тўқдим, тилаб висол,
Йиғлаб-йиғлаб нола билан зиёдаман.
Бутун вужуд титрар, гўё таним беҳол,
Роббим томон қўлим очиб дуодаман.

Кўз-ёшларим тинмайди ҳеч, қалб ёнажак,
Қачон дийдор булоғидан дил қонажак?

Қандай етай Сенга айтгин эй, Ойжамол,

Ё Раб томон қўлим очиб дуодаман.

Сўраганим бергувчисан ўзинг Аллоҳ,

Қодирликда қодир Сенсан буюк илоҳ.

Ёлвораман, ишқим Сенда ол, олақол,

Аллоҳ томон қўлим очиб дуодаман.

Хуфтон бўлди, жолам тугаб саҳродаман,

Нолам чиқмай томоқ қуриб қаҳродаман.

Ҳамон лаббим пичирлайди, кўрганлар лол,

Ўзинг томон қўлим очиб дуодаман.

Илтижо

Пойига бош қўйганимсан,

Дардлар бериб суйганимсан.

Ишқида минг куйганимсан.

Бедор тунлар қилсам оҳим,

Ёлғизгинам ўт гуноҳим.

Яралдимки дилимдасан,

Дилим бирла тилимдасан.

Ўнгу, сўлим йўлимдасан.

Бедор тунлар қилсам оҳим,

Ёлғизгинам ўт гуноҳим.

Раҳмлисан, меҳрибоним,
Измингдадир ҳар бир оним.

Тўкилиб бу хаста жоним.
Бедор тунлар қилсам оҳим,
Ёлғизгинам ўт гуноҳим.

Сен томондан келса хабар,
Бу дунёдан ўтсам агар.
Турсам унда, бўлса Махшар.
Шодиянгни тингла оҳин,
Ёлғизгинам ўт гуноҳим.

Севдим

Бандангнимас Ё Раб Сени,
Ўзлимдан кечиб севадим.
Авфу айла, кечир мени,
Ишқ майидан ичиб севадим!

Такрор олиб сўзларимга,
Йиғлаб босиб юзларимга.
Суртиб-суртиб кўзларимга,

Қуръонингни қучиб севдим!

Ибодатда дилларимни,
Бийрон қилиб тилларимни.
Дуога жуфт қўлларимни,
Жойнамозда очиб севдим!

Хирс кўчада ликиллаган,
Хасад, кибр сакиллаган.
Мол-дунёга ҳакиллаган,
Шум нафсимни бичиб севдим!

Шафоатинг сўраб ҳар кун,
Ёшим ювган дилим махзун.
Нур жамолинг кўрмоқ учун,
Каъбанг томон шошиб севдим!

Кўзларда ёш, киприklar нам,
Ишқ майини ичиб севдим!
Ё Раб Сени Ўзимдан ҳам,
Кеча-кундуз кечиб севдим!

Рамазон

Нафсимиз қилса нени,

Ғафлатда бўлдик ҳазон.

Соғиниб кеттик сени,

Хуш келибсан Рамазон!

Раҳматларга тўлган ой,

Қуръон нозил бўлган ой.

Нафсларимиз ўлган ой,

Хуш келибсан Рамазон!

Саҳарларинг ғанимат,

Ифторликларинг неъмат.

Ҳар бир сониянги ҳикмат,

Хуш келибсан Рамазон!

Шафқат бўлиб келган ой,

Ҳикмат бўлиб келган ой.

Савоб, ажрларга бой,

Хуш келибсан Рамазон!

Кишанланар шайтонлар,

Тавба қилинг ёмонлар.

Руҳни покланг инсонлар,

Хуш келибсан Рамазон!

Сенда Қадр кеча бор,
Сенда сабр кеча бор.
Ажри аср кеча бор,
Хуш келибсан Рамазон!

Мўмининг давлатисан,
Солиҳнинг савлатисан.
Руҳимнинг жаннатисан,
Хуш келибсан Рамазон!

Қосимова Шодияхон Саидғофур қизи

Эслатма: Сиз ҳам «Ислом.уз-1444» танловида қатнашмоқчимисиз? Унда қуйидаги <https://islom.uz/maqola/19769> ҳавола орқали мусобақа шартлари билан танишинг ва танловда иштирок этинг!

Ушбу шеър Ўзбекистон Республикаси Дин ишлари бўйича қўмитанинг 2023 йил 10 майдаги 03-07/3450-рақамли хулосаси асосида тайёрланди.